

EU-Kommissioun – 12.07.2018

D'EU-Kommissioun ass de Kär vun der exekutiver Gewalt vun der Europäescher Unioun. Exekutiv heescht, dass d'Kommissioun déi Reglementer an Direktiven, déi vum Europäesche Parlament a vum Rot vun der EU gestëmmt goufen, ëmsetzt. D'Reglementer an d'Direktiven si quasi wéi Gesetzer, déi fir all europäesche Memberstaat gëllen.

Wéi vill aner Institutiounen vun der EU befënnt sech d'EU-Kommissioun zu Bréissel. Si besteet aus 28 X Kommissären a Kommissärinnen an engem President oder enger Presidentin. Den aktuelle President vun der Kommissioun ass de fréiere lëtzebuergesche Premierminister Jean-Claude Juncker. Fir all Memberstaat gëtt et ee Kommissär oder eng Kommissärin. Si si fir ee bestëmmte Beräich zoustänneg, wéi zum Beispill Landwirtschaft, Handel oder Ekonomie.

Eng vun den Haaptaufgaben vun der Kommissioun ass et, nei Direktiven a Reglementer auszeschaffen a virzeschloen. Si këmmert sech och ëm dat deeglecht Geschäft, also ëm de politeschen Alldag vun der EU. Domat huet si e wichtege Afloss op d'Richtung vun der EU-Politik. Si stellt och de Budget vun der EU op, deen allerdéngs vum Europäesche Parlament a vum Rot vun der EU ofgeleent ka ginn. D'EU-Kommissioun verhandelt och international Handelsverträge mat anere Länner, wa si dozou vun de Memberstaaten opgefuerdert gëtt. Schliisslech stellt si sécher, dass d'EU-Memberstaaten sech un déi europäesch Verträge halen. D'EU-Verträge sinn d'Basis vun der EU an d'Memberstaaten hu sech duerch hir Ënnerschreift dozou verpflichtet, sech un déi Verträge ze halen.

D'Aart a Weis, wéi d'EU-Kommissioun gewielt gëtt, ass zimlech komplex. Als éischt gëtt de President oder d'Presidentin vun de Stats- a Regierungschefen vun den EU-Memberlänner am Europäesche Rot op Basis vun den Europawahlen virgeschloen. Dat heescht, dass d'Persoun, déi virgeschloen gëtt, aus deem politesche Grupp kënnt, deen d'Europawahl gewonnen huet. Bei de leschten Europawahlen goufen et déi éischt kéier Spëtzekandidaten a Spëtzekandidatinne aus alle politesche Gruppen, déi fir d'Amt vun der Kommissiouns- oder der Kommissiounspräsidentin kandidéiert hunn.

Déi virgeschloen Persoun wielt dann, op der Basis vu Virschléi vun de verschiddene Memberstaaten, seng Kommissären a Kommissärinnen aus. All EU-Memberstaat huet nämlech ee Kommissär oder eng Kommissärin zegutt. D'Europäescht Parlament muss dann déi ausgewielte Kandidaten a Kandidatinnen an de President oder d'Presidentin bestätegen oder ofleenen. D'Kandidaten an d'Kandidatinne mussen dem Parlament dann och hire Programm virstellen, dee si an hire fënnef Joer Amtszäit wëllen ëmsetzen. Si mussen den Deputéierten vum Europäesche Parlament och am Kader vun enger öffentlecher Versammlung am Parlament Ried an Äntwert stoen. Esou préift d'Parlament, ob d'Kandidaten an d'Kandidatinne sech fir déi jeeweileg Posten eegnen.